

**Date – 07/11/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Sinlung Hills Council inthlannaa New Vervek biala vote tla chhiar nawn naah ZPM candidate Pu Lalhlunchhunga tlinga puan a ni.**
- 2. Chief Minister Pu Lalduhoma hovin Bana Kaih chungchang sawihona leh Thlai Thar Market chu nimin khan Aizawlah neih a ni.**
- 3. Union Education Minister Dharmendra Pradhan chuan PM Vidyalaxmi scheme chuan zirlaite tan zirna sang zawk um kawnga harsatna awm thin a ti tlem ang a ti.**
- 4. Union Minister of Statte for Personner, Public Grievances and Pension Dr. Jitendra Singh chuan nimin khan Nation-Wide Life Certificate Campaign 3.0 New Delhi ah a hawng.**

<><><>

**SHC POLLS**

**Sinlung Hills Council inthlannaa New Vervek biala vote tla chhiar nawn naah ZPM candidate Pu Lalhlunchhunga chuan vote 396 a hmu a, tlinga puan a ni.**

**Amah hnaih ber tu MNF Canidate Pu C.Lalnuntlanga chuan vote 384 a hmu a, an vote hmuh zat inthlauhna hi vote 12 a ni. Ti hian MNF party in seat 12-ah 7 an la a, rorellai ZPM in 4 an laa, Congress Party in seat 1 an la a ni.**

**Puan tawh angin New Vervek bialah hian thil fello engemaw awma sawi a nih avangin nimin khan Aizawl Dist Election Officer Pu Lalhriatpuia kaihhruaiin nimin tlai dar 4 khan Aizawl DC Office ah chhiar nawn a ni a, New Vervek Constituency ah hian polling station 3 a awm a, chungte chu New Vervek, Lungsum leh Vervek (Damdiai) te an ni a. Heng Polling Station a vote tla hi a vaiin 953 a ni a, vote thi 16 a awm bawk a ni.**

**Vote chhiar nawnna ah hian Election Observer Pu James Lalrinchhana, Addl. DC & Dy.District Election Officer Pu Mark Lalthanliana, Addl. DC Pi P.C. Zonuntluangi, Election Officer, Aizawl Pu Samuel Zodinsanga, BDO Tlangnuam/SDC Dr. Lalchamliani te en tel a, anni bakah hian Counting Official atana ruat thar te, Candidate te aiawh Counting Agent te bakah political party aiawh te an tel a ni.**

Vote tla chhiar nawna hmunah hian venhimna uluk taka kenkawh niin fimkhur tak leh boruak muanawm tak hnuaiyah vote tla chhiar nawna neih a nih thu sorkar thuchhuah chuan a sawi a ni.

New Vervek biala vote chhiar chungchangah sawiselna a awm a, sawiseltu te hi New Vervek VCP leh Secretary leh MNF Unit President an ni a, State Election Commission ah thlengin, heng mite hian vote chhiar chungchang an sawisel avangin vote thlak that tul ti lovin, chhiar that a, a chhiar tute pawh mithar vek dahin, party agent te pawh an tel tir vek a ni.

◇◇◇◇◇

#### CYBER CRIME

Internet hmanga inbumna, Cyber crime ah Mizorama case lut tam ber chu suma inbumna a ni a, a dawt leh chu mipat hmeichhiatna hmansual a ni tih Mizoram Police Cyber Crime SP Pu VL Lura Hauzel chuan a sawi.

Suma inbumna a inhnawh zingah hian kum 20 - 40 an tam ber a, mipat hmichhiat hmansual a intihmualpho na case ah hian kum 40- 60 an tam ber thung a ti.

Heng bakah hian social media hmansual leh investment lem case a tam leh a, mi kutchhuak lakchawn mai te, kumtinglo mipat hmeichhiatna thila hman leh mi nihna hmanga inbumna te a tam em avangin mitin te fimkhur turin Pu VL Lura Hauzel, Sp Cyber Crime chuan a chah a, mi a taka hriat ni lemlo, facebook vel kaltlanga inhmelhriat te lakah mimal document pawimawh heng aadhar te, OTP te pechhuak lo turin mipui a chah a ni.

Mziram Police ah cyber crime unit hi kum 2021 khan din a ani a, internet kaltlanga buaina nei te tan Police station a FIR thehluh chu a la kalhmang ber a ni a, online pawhin a theih tawh thu Pu VL Lura chuan asawi baw, tin Mizoram police station te hian FIR ziahluh man hi pawisa an la ngailo tih a sawi baw.

Mizorama cyber crime a thubuai lut tam ber chu suma inbumna a ni a, case register tute sumfai hi kum 2021 - oct 2024 chhung khan Mizoram Police cyber crime te chuan chng nuai 80, sing 6, sang 4, 558 an hmulet tawh a, hetiang kaihnawih a hman mobile phone 106 lai an block tawh a ni. Social media a intih mualpho te, mipat hmeichhiatna hmansual te pawh case engemaw register tawh a ni. Kum 4 kalta chhung khan internet hmanga buaina ah mi 102 man anni tawh a, mi 38 tan tir anni tawh baw. Kum tlinglo te pawh man tel niin nikum khan mi 3 an man a, kumin 2024 ah mi 2 an man tawh baw.

◇◇◇◇◇

#### CM

Mizoram Agricultural Marketing Board buatsaihin Bana Kaih Sensitization cum Consultation Meeting on Thlai Thar Market chu nimin khan Aizawla I&PR Auditorium-ah buatsaih a ni a. Chief Minister Pu Lalduhoma chuan he hun hi a telpui.

Chief Minister chuan, MAMB in thlai thar thlan chhuah palite lei dan tur ruahmanna kimchang tak an siam avangin lawmthu a hrilh a. A hlawhtlin

theih nana thil tul te chu chak takin kan umzui zel dawn a ni, a ti. Handholding hmalak chhoh dan thil dangte pawh a tarlang bawk.

Agriculture Minister Pu PC Vanlalruata leh Adviser to CM (Handholding) Dr. KC Lalmalsawmzauva ten Thlai Thar Market kalpui dan tur an ruahmannate an sawi a ni.

Mizoram sawrkar chuan Standard Operating Procedure for Societies in the sale of notified crops Notification te, District Agricultural Marketing Committee (DAMC) dinna Notification te leh Secondary Collection Centre SOP Notification te thla kalta October ni 28 khan a tichhuak a. District Committee te nena zirhona hi neih vek tawh a ni a, DAMC hian an district-a khaw tinah inhrilhhriatna an kalpui ve leh ang. Thlai Thar Market kaihhruaina lehkhabu pawh tihchhuah tawh a ni.

He inkhawm hi Mizoram Agricultural Marketing Board (MAMB) Managing Director Pu Lalhmingmuanan a kaihruai a ni.



**LZA**

Thirsakawr hmanga ramchhung fang chhuaktu Pu Vanlallawmzuala Varte (LZA) Mission Veng châwimâwina leh lawmpuina hun Mizoram Pollution Control Board (MPCB) chuan Aizawlah a buatsaih a, Environment Forest & Climate Change Pu Lalthansanga'n he hun hi a hmanpui.

Pu Lalthansanga chuan Pu Lza'n India ram fang chhuak tur khawpa tum ruhna leh thawh rimna châng a hriate leh amah pui tura Mizoram Pollution Control Board (MPCB) thlanna châng a hriate chu a finthlâkin lâwmawm a ti a, Mizoram Pollution Control Board pawh Mizoram tâna tihchangtlun chhoh zêl a tûl thu a sawi a. Mizote kan hrisêl chhoh zêl theih nân thirsakawr khalh uar deuh deuh thei ila a duh thu a sawi bawk.

Tour hi 'Ride to Clean Air' thupui hmanga 'Clean & Green Sustainable Lifestyle Under Mission Life' hnuaiah Mizoram Pollution Control Board hi Main Sponsor niin kumin kumtir January ni 25 khan MINECO atangin MPCB Chairman Pu Liankima Lailung chuan a vailiam a. Nimin November ni 5 khan Pu Lza hian Aizawl alo thleng a ni.



**SPEAKER**

Australia Sydney-a ni thum awh tur 67th Commonwealth Parliamentary Conference-ah Mizoram Legislative Assembly Speaker Pu Lalbiakzama chu a tel a.

Nimina tan, Commonwealth Parliamentary Conference vawi 67-naah hian thupui atan, "Engage, empower, sustain - charting the course for resilient democracy" tih hman a ni a. Speaker Pu Lalbiakzama hian workshop hrang hrang awm zinga "Building bridges: Parliamentary frameworks for meaningfully engaging with indigenous peoples" tih leh "Human trafficking,

refugees and immigration across the Commonwealth: Open doors or building walls”-ah te chanvo pawimawh tak tak a nei a ni.

Conference-ah hian India leh Commonwealth ram hrang hranga Parliamentarian-te leh official-te an tel a ni.



LADC

Lawngtlai District Deputy Commissioner chuan tunlaia Sialsir (Amur Falcon-Falco Amurensis) Sava pêm mêk te humhalh tura mipuite ngenna thuchhuah a siam a,

Tun lai hian Sialsir pem an chawlh lai a ni a, Sialsir sava te hi sahel eichi sava te zingah chuan hriat theih china pem thui ber an ni a. Mongolia, China leh Russia ram atangin thlasik khawvawt tlansanin, South Africa-ah daih an pem thin a, Khuangchawi thla laihawl hian Mizoram pawh lo thlengin an chawl hahdam thin a ni. Pawtlak thlaah chuan Mizoram hi an chhuahsan fel thawkhat tawh a ngaih a ni.

Heng mikhual, lam hla tak a kal tur te hi, Mizoram leilunga hlau lo leh thlabar loa hahdam taka an chawlh theih nana lo humhim leh chawlhna tlaka lo enkawl chu mipui tih tur reng a ni, a ti. Mizoram ah hian sava chi hrang hrang 670 vel awm anga ngaih an ni a, chung zingah chuan thlasik laia lo pem thin te, nipui laia cheng thin leh pemna kalkawnga minrawn paltlang thin eng emaw zat an awm bawk a ni.



NATIONAL ADOPTION MONTH

Siaha-ah District Child Protection Union (DCPU) buatsaihin Adoption Awareness Month nimin khan hawn a ni a, MADC a SWD changtu Executive Member Pu T Seido chuan a hmanpui. Kumin Awareness Month thupui atan ‘Rehabilitation of older children through Foster care and Foster Adoption’ tih chu hman a ni.

SWD changtu Executive Member chuan Nu leh pa leh enkawltu mumal neilo, fahrahte nun riangvai zia sawiin ‘Fahrah puan hlai’ tih tawngkam awm chuan an dinhmun a pholang chiang hle a ti a, dan ang taka fa lak chu naupangte tan khawvel nuam tak siamsakna rahbi pawimawh tak a ni, a ti bawk.

Sawrkar Laipuiin Naupangte humhalh nan dan pawimawh tak tak, POCSO Act te, Juvenile Justice Act te a duang chhuak tiin an duan anga tangkai taka hman a nih theih nan mipui nawlpuiin awareness kan neih a ngai a ti a, heng dan tha tak tak te hmang tangkaitu ni theuh turin a chah a ni. Adoption Centre leh naupang humhalhna kawnga thawktute pawh fuihin hmangaihna rilru nen tih tak zeta an hna thawk theuh turin a fuih bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



#### PM-VIDYALAXMI

Union Education Minister Dharmendra Pradhan chuan cheng vaibelchhe 3600 senna tur PM Vidyalaxmi scheme chuan zirlaite tan zirna sang zawk um kawnga harsatna awm thin a ti tlem ang a, an beiseina a tihlawhtling dawn a ni a ti. Nimin khan Sawrkar laipui chuan zirlai thiamtheite suma puihna tur PM-Vidyalaxmi scheme hi a pawm a. Union Information & Broadcasting Minister Ashwini Vaishnaw chuan hemi chungchanga Union Cabinet thutlukna hi chanchinbumite hmaah sawiin zirlai zingah zirna sang zawka kal zel duh tan he tanpuina hi siam a ni a ti a. Sum leh paia harsatna avanga zirna sang zawk chhonzawm thei lo zirlai an awmlohna turin he scheme hi sawrkarin a kalpui tur thu a sawi.

Hei bakah hian Pu Vaishnaw chuan Food Corporation of India tana cheng vaibelchhe sing 1 leh 700 senna tur sawrkarin a pawm thu a sawi a. Hei hian ram puma FCI hnathawhna kawngah hmasawna thui tak a thlen dawn a ni a ti.



#### DLC

Union Minister of Statte for Personner, Public Grievances and Pension Dr. Jitendra Singh chuan nimin khan Nation-Wide Life Certificate Campaign 3.0 New Delhi ah a hawng. Thusawiin Dr.Singh-a chuan Digital Life Certificate, Jeevan Praman hi Pensioner te dinhmun siamthat nana Prime Minister Narendra Modia hmathlir a ni a ti.

Kan correspondent sawidanin he campaign ah hian ramchhunga khawpui leh khawpuite 800 ah DLC Camp 1900 siam a ni ang a, nodal officer 1100 chuangin an vil dawn a. Hei bakah hian India Post Payment Bank Camp-ah te Gramin Dak Sewaks nuai 1 leh sing 8 chuangin khawpui leh khawhpuite 785 chuangah mipuite tan hna an thawk dawn bawk a. Pension Disbursing Bank te pawhin khawpui leh khawpuite 157 ah DLC camp an siam dawn a ni.

#### UP

Uttar Pradesh-a lirthei chesualah mi 10 an thi. Thudawn danin chetsualna hi Hardoi district-a thleng niin auto leh truck an insu a. Auto-a chuang hmeichhe pathum leh naupang 3 tiamin mi 10 an thi a. Hardoi SP chuan chetsualna thlen chhan tak hi hriat anih loh thu sawiin an chhui zui mek a ni a ti.

President Draupadi Murmu leh Prime Minister Narendra Modia te chuan nunna chan an awm chu pawin an tih thu leh an chungte an tawrhpuin thu a sawi a. Mitthi chungte hnenah hian cheng nuai 2 theuh pek an nih tur thu a puang nghal a ni.